



05912

蒼峴山人文集卷四

嚴中允傳

世有真名士而後有賢士大夫此古今之通論也然而名士難言之矣昔袁侍中謂韓康伯門庭蕭寂居然名士風流王濟輕其叔湛晚與論易始知之歎曰家有名士三十年而不知濟之罪也夫以門庭蕭寂爲名士則今日之馳騫交遊冠蓋充其門者非名士也以三十年不知爲名士則今日之日事竿牘急求人知者非名士也惟其處而有夷然不屑之概故出有難進易退之風處而有闔然不露之藏故出有三公不易之節此賢士大夫之必出於名士

蒼峴山人文集

卷四

一

與吾於同邑得其人焉作嚴中允傳君名繩孫字蓀友江南無錫人祖一鵬明刑部侍郎贈尚書父紹宗副貢生明亡後隱居不仕康熙己未君以博學鴻詞薦

召試太和殿授翰林院檢討尋充日講起居注官遷右春坊右中允兼翰林院編修方君之被薦也貽書京師諸公曰聞薦舉濫及賤名某雖愚自幼不希無妄之福今行老矣無論試而見黜爲不知者所姍笑卽不爾去就當何從哉竊謂堯舜在上而欲全草澤之身以沒餘齒寧有不

得惟卒加保護時有司奉

詔敦趣君引疾不許旣抵京赴吏部自陳疾不能應試狀至再四終不允



御試之日發題賦序詩各一首君賦省耕詩一首而出
上素稔君姓字

諭閣臣曰史局不可無此人

詔下入選者五十人同日入翰林君與焉蓋五十人中布
衣四人富平李因篤秀水朱彝尊吳江潘耒其一則君也
君生平未嘗以詩文干謁然所在輒爲人傳誦鈔寫至流
傳

官禁遂以受

上知官侍從遇合之隆近古未有既入翰林

纂修明史平定三逆方略晝夜不輟及奉

命典山西試誓得真士尚書蔚州魏環極先生稱君得人

蒼峴山人文集

卷四

二

最盛館閣應奉文字院長率以屬君君在職五年嘗侍宴

保和殿

上賦昇平嘉讌詩君同羣臣繼和稱

旨特命撤

御前金盤棗脯以賜又從容語左右嚴某好人中外皆知
上眷君厚望旦夕進用而君竟請假歸矣初君拜官日卽
揭淵明歸去來辭於壁蓋恬靜不慕榮利其天性然也君
旣負重望諸以意氣相徵逐聲譽勢力相傾動者咸願交
君君落落而已然不爲崖異之行以自表襮且有雅量能
茹納故雖素習君者見謂與人樂易而其矜然恐澆之意
世或未盡知在史館時分撰明史列傳於隱逸尤致意焉

其序曰明興當兵革之後太祖用法嚴急故其時蘊志疾俗不可得致者甚衆迨中葉承平聲教淪浹遐世无悶亦多其人其後士習漸漓或布衣而談門戶標舉風流用相誇飾矜清節者或寡矣夫隱亦不一其轍固有言用當世身立本朝而不在其位者外是寧始顯而終晦毋前舍而後用至乃階高蹈以詭祿仕又街寵而凌俗焉若宋种放之徒不以著於篇烏虜觀其所論列可以知君矣君讀書不務強記案上惟置一編終日不易他書或數日纔一易既讀則終身不忘家居自對客外未嘗一刻廢讀爲文宗先秦兩漢尤近范蔚宗詩冲融澹易閒雅深秀如其爲人所著秋水集共若干卷弱歲能徑尺大字晚於細楷尤工

蒼峴山人文集

卷四

三

間作小畫寸縑片紙輒爲時珍賞而君絕不樂以自名葉侍郎訥菴嘗序君集曰君二十餘棄諸生優游環堵終年嘯傲無動乎其中而亦無炫乎其外通國之人皆高其行而君初不自知侍郎爲君布衣交其言信而有徵云君見俗儒緣飾外貌高談性命輒薄之嘗語人曰吾一生所見眞道學惟睢州湯潛菴先生一人其志趣蓋如此年八十卒君有墓田在邑西洋溪之上溪有橋曰藕蕩君曰吾得常依邱壠棲遲耕釣足矣因自號藕蕩漁人

馬雲翎傳

雲翎姓馬氏名翀無錫人也祖世奇明崇禎中官左諭德甲申殉難京師諡文肅父壬玉邑諸生高才博學邁國變

悒悒不得志卒時雲翎方三歲母薛鞠之迄於成立雲翎鬢髯凝重又穎慧就外傳日記千言稍長學爲文文卽工以其暇爲詩歌才氣橫逸嘗作鶴上謠五十首一夕而成多幽詭奇絕之語時大司馬畱邨吳公方爲無錫令試童子拔雲翎第一補博士弟子員雲翎才名日盛而顧深自閉匿撫心下氣從事應舉之業以慰其母康熙壬子舉於鄉以應禮部試入都門有時貴欲致雲翎門下者遣人諭意雲翎婉辭之作靜女吟自况再試不第遂歸發文肅藏書讀之杜門謝客以植學蓄德爲務時吳公尚令錫益重雲翎雲翎卒未嘗干以私戊午遽以病歿年三十天下之士聞者莫不悲之方雲翎之長也去文肅殉國時已二

十餘年中更多故門戶非昔母薛劬瘁持家僅免凌替而雲翎拔起孤露卓然以文章自見可謂難矣然世之名能文章者或牽引朋類游揚聲光以梯榮而媒利求其內行純潔如雲翎者蓋寡也雲翎詩取材西崑而實源於古樂府吳梅邨祭酒王阮亭侍郎俱見稱賞阮亭曰雲翎竹枝詞妙入三昧自元白夢得廉夫數公後不聞此調久矣其爲前輩名流推重如此黃漢臣先生雲翎師也先生深通內典雲翎亦好從諸禪宿游喜放生凡利物之事無不爲其師歿輯其文以傳而撫其嗣子居平無狎游無諛語盛暑燕坐不解帶檢身若處子學道如定僧然則天雖奪雲翎之年而所以厚雲翎者或在彼不在此也

舊史氏曰戊午春

詔舉文學之士集於

闕下余嘗語崑山葉學士此舉不及雲翎爲缺事學士曰雲翎年尚少畱爲南宮第一人何不可者孰知其遂卒於是秋不及待禮部試耶吾邑有黃瑚者字夏蓀工古文詞亦爲吳祭酒葉學士所賞方辟大科學士以瑚名上徵書下病厲不行而死亦可悲矣

邵經農傳

吾邑有讀書學古之士二人一曰邵經農一曰劉言潔前年言潔亡今年經農又亡二人者年未衰學未可量其所至皆不幸以死自二人死而吾邑少善讀書者矣豈不惜

蒼峴山人文集

卷四

五

哉經農名緒廣一字義書祖名世明天啓中進士官山東右布政使有清望父儒炳母張戶部尚書有譽女也尚書博通百氏之書與布政俱老壽經農稍長及受兩家之教故學有原委不沾沾經生家言年二十餘與言潔同補博士弟子員才名相亞自此與言潔砥礪名行考質文藝務以古人爲師言潔氣高岸不可一世而經農循循謹飭言動不欲先人言潔文沈雄經農澹折格不同而原本經術則一經農所交皆天下知名士而心折者言潔一人而已經農雖世家子家故貧敝衣糲食恬然無所介於懷喪婦不更娶獨處者終其身性愛書授徒所入脩脯盡以易書晝夜校讎所居一小室凝塵不掃圖史縱橫藥爐茗椀餼

餽果食與筆研雜陳於六經子史旁及佛老之言莫不精
研淹貫晚益潛心宋五子書著四書抉微若干卷餘所著
南華經注經學雜纂字學源流等書數十卷經農少工制
舉業年四十後專肆力於古文辭文近南宋諸家不事摹
倣而有其風格詩不多作善論古人詩而獨拙於書法點
畫簡率塗乙錯互文成惟一二人能辨之他人不能辨也
方言潔病革經農往視言潔口誦平日所讀書不輟經農
曰心不可有一物於書不能忘亦病也言潔瞿然起坐曰
如君言又嘗與言潔論學言潔曰志不高者學不達氣不
盛者才不肆立吾志養吾氣庶幾追古人而從之經農曰
言不根諸理則其言邪理不本諸躬行則其言僞蓋二人
蒼峴山人文集

卷四

六

志趣高遠其不同流俗如此言潔名齊嘗以選貢入太學
時崑山尚書方收召後進士欲致言潔門下言潔作閩女
詞五章謝焉旣而某少宰更欲致言潔亦不往余故爲經
農傳牽連書之而深以二人之亡爲可惜也

過百齡傳

百齡姓過氏無錫人也無錫多佳山水間生瑰閎奇特之
士若倪徵君雲林以畫華學士鴻山以詩王僉事仲山以
書俱爲世稱述迺今百齡特以奕聞百齡生而穎慧好讀
書年十一見人奕卽盡得其虛實先後進擊退守之法與
人奕輒勝閭黨間無不奇百齡者時福唐相臺山葉公奕
品居第二過無錫求可與敵者諸鄉先生請召百齡至則

一童子也葉公已奇之及奕葉公輒負諸鄉先生耳語百齡曰葉公貴人若當陽負何屢勝百齡色然曰奕固小技然枉道媚人吾恥焉况葉公賢者也豈以此罪童子葉公聞而重之欲載之去百齡辭自是而百齡之名益著京師諸公卿聞而邀致之有林生者先百齡得名見百齡年少意輕之一日諸公卿會飲林笑視百齡曰吾與若同遊京師未嘗一爭道角技卽諸先生何所用吾與若耶今願畢其所長博諸先生歡諸公卿皆曰諾遂爭出注約百緡百齡固謝不敢林益驕益強之遂敵道奕奕未半林面赤汗沾頰而百齡信手落子旁若無人凡三戰林三敗諸公卿譁然曰林生雅自負今得過生迺奪之矣復皆大笑於是

蒼峴山人文集

卷四

七

百齡棋品遂第一當是時居停主某錦衣以事繫獄或謂百齡曰君爲錦衣客須謹避不然禍將及百齡曰噫錦衣遇我厚今彼有難而去之不義且吾與之交未嘗干以私禍必不及時同客錦衣者悉被繫百齡竟免已而天下多故百齡不欲久畱遂歸日與一二酒徒狂嘯縱飲不數與人奕而顧好博博輒敗向奕時所得貲盡失之百齡各文年以字行人皆稱曰過百齡云

徐母王孺人家傳

世之稱令妻賢母者必曰能持家識大體撫他出之子有恩有一於此已足爲難况能兼之者乎然能持家矣或僅瑣瑣於米鹽之務識大體矣未必曉然於忠孝之節撫他

出之子有恩矣或過示慈愛而乖義方是兼之者猶未爲甚難也若余聞徐母王孺人之賢則誠難矣王氏本山陰右族孺人父維城始遷順天之房山方李自成陷京師孺人年十六聞國破君死社稷悲慟不食者數日繼聞

王師入關破賊始食自是蔬食終其身年二十四歸同里徐君君重君重輕財好施孺人典衣脫簪珥助之以家京師久親柩未葬者兩世君重方營宅兆而歿孺人泣曰我婦而子也御君重柩還山陰葬三世十一喪觀者歎息君重之姊適何者貧無子適錢者甫嫁而寡孺人俱迎之同居死則親護其喪歸兩從子以父歿於官來依君重而君重歿孺人撫之如子君重生子二皆旁出也生而其母亡

孺人親抱育之及長呼而告以所自出曰胡可因我而滅其母而孺人督訓兩子極嚴其長子永言爲知縣歷宰劇邑所至有聲悉孺人之教也孺人幼知大義聞人言忠孝節烈事則欣喜讚歎或言有不合於義者遽止之不令竟其說性勤儉辨色晨興必先其家人庀治家政廳屏內外井井如也首不耀珠翠之飾身不御紈縠之衣澹泊自甘卒勉其子爲廉吏年六十八歿於無錫官舍嗟乎觀孺人之生平所謂能持家識大體撫他出之子有恩蓋已賢矣然而世之令妻賢母猶或能之至於以一弱女子聞國家之變號慟絕食以孤嫠提攜幼子跋涉三千里葬三世之喪此須眉丈夫有弗如者也永言治無錫最久余得備聞

孺人懿行故爲之傳

從祖文學再遷公家傳

某讀後漢書至黃憲傳史稱其言論風旨無可稱述且年又不永而當日賢如荀淑袁閎陳蕃郭林宗輩願交惟恐不得何與蓋古之善觀人者不以形迹而以神理不以名位而以器識憲於斯二者必其軼倫超羣有足取重於當世者然也某於從祖再遷公蓋謂有憲之風焉公爲贈大夫上生先生孫貢生儼塵先生子兩先生皆績學篤行其教子孫具有成法儼塵先生長子鼎初早世次甲先出後大宗及公之生先生老矣雖甚憐愛而教之特嚴言動必於禮某每候先生起居公必在側時十餘齡耳玉色秀眉

蒼峴山人文集

卷四

九

骨稜稜出衣表步趨唯諾整肅舒暇問以所讀書則酬對如響無何先生卒公年甫十三遭父喪哀毀過於成人稍長營葬事動合古禮儼塵先生向設義田贍族入行之數十年公於內外親戚婚喪賻贈有加其甚貧者以時賙之蓋篤於倫理如此性凝重無統綺之習無狎邪之游所居有小園頗疎曠終日盤桓其中擁書端坐寂如無人一二友人過從啜茗論文不雜俗語顧胸中炯炯是非別白稠人廣衆中偶發一語必中窾要嗟乎如公者不庶幾所謂汪汪若千頃陂者耶年二十二補邑諸生是秋遽遭疾不起夫以公神理清徹器識厚重立身無纖毫之過加以祖父之世澤而乃始爲諸生卽懼天折其齒且遠不逮憲何

耶然公歿後其配胡孺人矢柏舟之操撫二子至於成立其長者今已登賢書諸孫且九人嗟乎觀公之嗇於身而豐於後而公亦可以無憾矣某及見公兩世知公稔謹述其梗槩以附家乘云

華仲通先生墓表

嗚呼是爲吾邑仲通華先生之墓先生諱時亨字仲通系出南齊孝子蓋奇偉卓行君子也幼勤於學有至性以孝友稱曾割股療其母忠憲高公極敬禮之無何遂有忠憲止水殉節之事先生實成之也蓋先生出忠憲門忠憲以忤璫削籍與周忠介文肅諸公日倡明理學於東林而先生以諸生列其間爲清流引重一日過吳門周忠介袖出片紙則稅璫李實疏所羅織東林諸君子詔付檻車者也忠介謂先生曰相知聚首在此一時名教之責付之子矣相與慷慨而別先生歸告忠憲忠憲遂於是夕死當是時巡撫都御史毛一鷺必欲根究漏洩者殺之以媚璫檄日下人無不危先生先生乃大聲疾呼日臨忠憲喪惟恐媚璫者不知會備兵周公召而匿之署密請都御史謂此奇士殺之益奇天下後世其謂公何事得寢自後先生名益高名公巨卿之締交與後學之士就教於門牆者日益衆偶過山陰訪倪文正公公爲言蕭山王生得罪於學使者下司李讞不得白先生曰司李與吾有舊當往爲王生白之旣往遂鳴其冤司李因出獄詞示先生先生攜至舟

中風雨晦冥詳求所以脫之者方函其牘忽視茫茫竟以是日失明而王生冤卒得白夫以先生之高義偉行方脫人於難而罹失明之禍天道其真不可知耶甲申後杜門著述日坐所謂劍光閣者聚生徒講學其中雖失明輒命一童子旁誦春秋左氏傳意有所發復命一童子旁書之所著有春秋法鑑錄蓋自託於左氏也又好易與人論易則疊疊不倦其祕旨多得之忠憲高公後爲墨令所構陷兩蹈不測而俱以瞽故免則向者以脫人禍而得疾或亦天之所以保全先生於後日耶某爲先生弟子知其詳因悼先生之歿而爲表之於墓云

慎閒李先生墓表

蒼峴山人文集

卷四

十一

順治甲午余獲舉於鄉計偕入都門時涇陽李子亦以舉陝西鄉試至名籍甚余訪諸秦中人士之知李子者咸曰微特李子才迺其尊人慎閒先生固賢者也戊戌李子成進士余始與定交見其莩儻易直獨心折焉旣而李子出其詩古文畧予雄深瑋麗予驚異其所從授李子間謂予曰念慈生未知學問蓋吾父之教也念慈髫髻時歲大飢穀踊貴學舍中所讀書悉吾父輟餐得之鄉先生馬元御者宿儒也念慈從之遊聲先世遺貲以爲贄念慈之稍有聞者吾父力也李子謁選得河間司理客有自河間至者輒言李子勤於其政慎平反嚴取子終歲不輕挾一人人亦莫敢干以私者他日余面質諸李子李子曰此非念

慈之能念慈方之官吾父諄諄訓以寬大且曰疏糲吾性所甘勿持官中一物餉我念慈謹受教自入官以暨卒任兢兢祈免於罪戾者實惟吾親之言云爾余迺知先生之賢能勗子於成者如此無何李子以母喪歸服除補廉州司李又改任山東新城令旋以調誤去官時余亦自翰林罷歸兩人不相見者數年適

朝廷用兵討吳逆余與李子俱以薦起奉檄之楚軍自是出入必偕與李子尤莫逆李子以才補湖廣景陵令有老生者忽稽首輿前曰某昔年羈旅平陽病垂死實太公再生之者也言已泣下予問之李子曰吾父行義非止此也吾父篤於天性事先王父母至孝王父母好施與吾父恆

蒼峴山人文集

卷四

七

預儲以待九重交游四方賓客之至者治酒醴膳羞惟恐不得當而於生死急難輒以身赴之救援如不及景陵生其一也余聞之迺知先生之賢非徒能教其子而其孝友長厚之行又如此會余與李子復以薦至京師共晨夕者數月迨李子復之景陵而先生竟卒於家矣越七年余屏居里閭李子以事南來手其所具先生事狀泣而言曰先子之生平君知之詳矣念慈生未有一日之養死又不獲躬含斂事往歲徂日月逾邁今葬有期矣念慈已乞長洲汪鈍翁銘先子之壙而墓道之文尚未有所屬敢以請余聞其言而悲之按狀先生諱紹允字慎閒世居山西之洪洞有仲德者自洪洞遷涇陽仲德生大大生剛剛生奈奈

生廷相廷相生世達嘉靖丙辰進士官南京吏部尚書諡敏肅爲隆萬間名臣敏肅子二長戶部郎中梓次樟梓無子樟子內閣中書舍人惟莊出後梓先生舍人之季子也生萬歷庚戌十一月初七日卒康熙辛酉十二月十六日年七十有二娶常氏有賢德生念慈未彌月而卒繼扈氏撫念慈如己出亦前先生卒子二長卽念慈順治戊戌進士湖廣景陵縣知縣次慕慈孫三謙諛訥孫女三念慈以某年月日葬先生於縣城東南祖塋之西而兩孺人祔焉惟念慈有道而文其言皆實無溢美而余文固無以加於鈍翁之文余庸所聞於念慈者論次之表先生之墓以告其後之人

蒼峴山人文集卷五

無錫秦松齡著

白心鄒君墓誌銘

君姓鄒氏諱初基字白心樗全子其別號也系出宋忠公
浩弟進士至遠曾祖泉祖懋官父恩光君少穎異弱冠補
邑諸生受業陳太常筠塘先生之門是時君族父副使迪
光負文章重望見君文輒嗟賞而君亦重自矜奮蚤夜讀
書至廢寢食凡試於鄉者七竟不遇遂棄舉子業一意古
學盡取經史及諸子百家之書讀之務爲周覽徧識鉤得
其要連類比綴間出已見洗滌浩瀚人莫得而窺其涯涘
也君生平尤邃於史於朝章國故靡不留意所著有五經
蒼峴山人文集 卷五 一

通說若干卷史眼若干卷明史大業若干卷文如三昧詩
話萃若干卷外書若干卷藏於家君儻闊達不拘拘邊
幅而天性篤摯於君父師友人倫事變之會未嘗不感慨
振奮思有所樹立父以目青廢君侍寢膳時其寒暖飲食
而爲之備弟妹婚嫁悉任之遇友人急難收視溫卹不問
有無少壯知交白首無違言胡君自下者雲間名士也嘗
爲君點定文字後以事坐累君感其誼爲擘畫事得解甲
申後絕意人世伏處草石間胸中耿耿不能摧抑時發之
詩歌危坐高吟悲傷宛轉聞者爲之動心晚逃於禪喜從
衲子游時領其旨趣法海碎金其暮年著也余觀東漢以
來號爲逸民獨行者多卓然可紀然往往偏性孤詣舍此

莫能自見如君之才夙有志當世非竟高蹈不返者顧不
獲有所建豎而僅以著述老其所著述又未能盡見於世
豈不惜哉君生於萬歷丙申六月十六日卒於康熙甲子
九月初六日君既不遇而得以隱逸自全故自號樗全子
云配方孺人孺人之歸君也家既貧敬事舅姑盡斥其奩
中具甘旨以時進君得以窮年誦讀而無內顧憂者孺人
之力爲多其生以萬歷己亥三月三十日卒以康熙辛亥
四月二十七日子二就鎔諸生娶徐氏宮歲貢生娶華氏
女二人諸生華嘉禎方洪其壻也孫男四人孫譽諸生孫
謨孫始國學生孫符女五人曾孫男五人女五人茲以某
年某月某日葬君與方孺人於沙墩口蓮花涇之原君之

蒼峴山人文集

卷五

二

二子先期來請銘余不獲辭銘曰

維鄒之先遠有世序晉陵來徙門望益巨宗族貴盛邦人
侈焉君於其間矻矻窮年其書滿車丹鉛甲乙經史禪乘
靡弗究悉用世之懷老弗獲信雖嗇其遇其人如存

進士敦若張公墓誌銘

士君子之處世必先辨其志志既立而濟之以學遂可終
身而不移夫世之能移人志者莫過於仕宦於此而不能
移則真君子矣若江陰敦若張公殆其人與公諱光第字
孟及晚號敦若先世無錫人高祖輔始占籍江陰青陽里
曾祖汝翼縣學生祖履正萬歷壬辰進士廣信府知府三
世俱贈太子太保戶部尚書父有譽天啟壬戌進士太子

太保戶部尚書名臣耆碩世所稱青暘先生者也妣謝氏
贈一品夫人公生而凝重沈默外樸而內慧年十六補博
士弟子員爲文宗古大家試輒冠其曹康熙壬寅以貢入
京師舉順天癸卯鄉試丁未成進士念尚書公年老遽歸
追尚書公沒服闋不赴吏部選乙卯除內閣中書舍人亦
不赴蓋通籍後家居者三十年終不出公篤於孝友尚書
公雖歷高位居官廉產不過中人公布衣蔬食絕去貴介
之習謝夫人卒於饒州官舍時公年甫十三扶櫬歸葬哀
感路人尚書公晚而學佛好信施公爲辦治悉當尚書公
意從兄弟十數人緩急必相濟患難必相恤至有脫之文
網者其待鄰里親黨一以誠信遇事激於義尤慷慨其卓
蒼峴山人文集 卷五

三

卓可紀者如葉侍郎茂才家式微其後人以訟案株連甚
衆公言於郡縣而直之馬文肅公長子壬玉歿應立後久
未決公拜見壬玉妻鄭告以宗法一言而定此二事尤爲
鄉黨所稱述生平所著易經彙解六卷尚書纂訓十卷南
山堂文集若干卷孝經衍義補者尚書公所著也其每章
補註數條多出公手公自貴公子至爲縉紳於地方當事
未嘗有私謁卽同籍至親仕宦近地以書招亦不往室中
無樗蒲博奕之具出行途中足跡所履直如引繩與人接
酬對甚簡好飲酒蒔花竹持杯徵詠陶然自得而已夫世
之稱公者皆以爲篤行好學君子而某獨於公出處之際
深有感焉公幼從尚書公宦遊南北習知國家典故民生

利病以名卿子發身高科爲當世羣公所引重使其出爲
民牧必大有所表襮卽不然內史一官素號清地不數年
可致通顯而公蕭然遠引不一濡足者蓋公清標雅尚不
慕榮利決之早而持之定此其志非淺識者所能窺也吾
邑之士嘗請祀尚書公於東林書院公曰先公逃於禪俎
亘諸儒間恐反失其真烏虜公於是益爲能見其大矣公
生於天啟壬戌四月初三日卒於康熙丙子十月二十四
日年七十五配無錫侯孺人舉人彥哲女先卒繼配無錫
華孺人國學生民佩女男子六人長世瑞縣學生早卒聘
無錫韓氏以守貞殉次世禎國學生娶武進楊氏先卒繼
娶戚氏次世錫娶貢氏俱先卒次世濟世寧俱早卒次世
蒼峴山人文集

卷五

四

綸府學增生娶呂氏俱華孺人出女子二人長適內國史
院典籍無錫顧貞觀侯孺人出次適國學生無錫倪宏烈
華孺人出孫女一人今世禎等葬公於某山某原先期來
請銘公於某爲母黨尊行事公最久不可謂不知公銘曰
烈烈張宗累世顯融郡守純德尚書清風象賢接武實惟
我公通經學古旣捷南宮脫屣廡仕獨葆貞素盛年高蹈
至於遲暮孝友忠信植節永固以承前人以詔後嗣

昌化縣知縣陶君紫司墓誌銘

常熟陶君紫司官廣東之昌化令以疾卒於官年止五十
二遠近知君者莫不惋惜之君爲余甲子所得士閱三載
而成進士需次里居常熟距吾邑百里而近時其晨夕旣

而別去宦於粵者五年輒念之不能置忽聞君訃余哭之
慟回首惘惘恆若有失旣而其兩孤扶君匱自粵歸將葬
君手具事狀先期請余銘君墓余不忍辭爰按狀參君文
集合諸見聞識其大者如左君諱元淳字紫司一號子師
世爲常熟人祖某父某妣某氏生子二人君其次也生而
警敏稍長攻文章未嘗起稿日可得數十篇皆原本經籍
祖述先輩諸大家貧甚不能蓄書間從其友沈氏家借閱
經史數十種晝夜誦習不少輟學益進試於有司輒不利
旣而遊京師徐健菴尚書雅重君爲之延譽名以日高而
其同邑某尚書者亦羨君名延之邸第爲授餐然君性剛
直每與尚書忤以是尚書轉銜之益都趙秋谷淄川畢公
蒼峴山人文集

卷五

五

權皆與君善才望相埒康熙己未

天子開博學鴻詞科光祿何公以君名上君已先期出都
門遣騎追君還復以病告甲子舉順天鄉試戊辰會試中
式及

殿試讀卷諸公俱歎爲奇才以對策請減蘇松浮糧語激
直抑置二甲是時崑山相國徐公爲明史館總裁欲畱君
君竟歸其年冬丁父艱辛未服闋癸酉除廣東昌化縣知
縣昌化地荒瘠城中居民僅七十餘家舊額田四百四十
餘頃浮糧荒糧未豁者無算民重困君至卽請於大府欲
除之力爭不得又作昌化縣浮糧考上之指畫痛切君在
官務節縮盡革一切陋規日供韭一束寒不坐乘暑不張

蓋遠出自備車牛從吏一二人見者不知其爲縣令招流
亡集商賈民漸樂業邑濱海患颶風海溢君爲文祭海神
患頓息嘗早禱於龍潭雨立應其他如別男女專員役減
火耗課藍蔗移民居闢學署以及操練鄉兵請免貢梨採
木等役皆政之大者無何權刺崖州而兩弁構黨之訟作
兩弁者游擊余守備黃也二人皆狡黠黃弁更以非刑殺
人斷手足棄郊外爲民所訴君受牒條列六款上制府時
兩弁方橫甚洵洵爭切持私送密揭於制府檄下瓊州總
兵官會鞠君毅然不屈謂密揭不應發審鎮臣不應侵官
若其是非倒置耳目盡塗狗奸弁之謀挫執法之氣灰任
事之心寧棄此一官以全政體不能匍伏於鎮臣之前也

蒼峴山人文集

卷五

六

巡撫高公知其言直特寢其事旣而制府竟於劾參武弁
疏內附劾君檢驗失實應降二級得

旨下部再議事竟得白丁丑遇

覃恩封贈父母如君官君歸志益決當道雷之不聽去而
君病矣病革時尚以昌化浮糧荒糧之弊未除爲恨烏虜
余之交君深矣君一生篤學不效世儒口說立異同謂聖
人之道至宋儒已明後人但當務躬行不當樹壇坫分門
戶居恆持論於相業則寧取張江陵能任怨責名實與
鄙夫之授受衣鉢貽誤社稷者迥別於將略則最取戚南
塘紀效新書謂客兵不如土兵土兵不如家兵真節制紀
律之道初效東南後用西北與他將之隨寇環走要君辱

國者功罪霄壤其纂輯明史以六部所統之政爲綱以各司所分之職爲目嘗欲自爲一書卒不就君之宦粵與巡撫高公前守張公皆始忤後合新撫蕭公欲特疏薦君而君已歿夫以君之才宜大表見於世而齟齬之者衆志不獲伸卒之直節孤行能見宥於

朝廷大臣且有欲薦之者而君又不幸以死此余所爲搢
寧太息而不能不致憾於天者也君生於順治丙戌十一月十二日卒於康熙戊寅九月十三日其葬也在壬午某月某日墓在其邑之某鄉某原配鮑氏封孺人子二長貞一娶俞氏次貞靖娶錢氏孫女一未字所著有文集若干卷廣東一統志十卷明史列傳若干卷藏於家余嘗謂君蒼峴山人文集卷五

七

議論如賈長沙政事如元道州文章如范蔚宗而沈淪一官賚志以歿可歎也其兩孤賢而有文所具行實質直無飾詞是宜銘銘曰

烏虜紫司其命嗇其學豐其文昌其遇窮儉耳萬里怪雨盲風一官海外竟喪厥躬彼蒼蒼者不可知而斯人復舉世其誰容琴川之濱兮劍門之峯君其埋此兮余以銘其幽宮

封武定府同知來陽顧先生墓誌銘

吾邑東里顧氏自其先東田公以循吏起家詩書之澤百餘年弗替至念田公而敦孝悌慎言行諸子守其法惟謹而來陽先生爲最著某與先生之伯子岱同舉於鄉獲拜

先生於堂下長身鶴立儀容偉然無愧鉅人長德也伯子成進士官山東武定府同知遇

覃恩封如子官配華氏

封宜人迨伯子累守大郡而季子崧亦舉於鄉宜人歿且十年先生年七十有九始卒卒之明年卜葬有日岱偕其諸弟衰經踵門請余銘先生墓某以通家子事先生三十餘年不可謂不知先生其何敢辭先生諱際虞字君明來陽其號也系出陳黃門侍郎野王元有勝四公者家於無錫四傳而爲先生之高祖封文林郎諱某曾祖湖廣襄陽縣知縣諱某卽東田公也祖在田公諱某父念田公諱某妣周孺人先生生有至性遭母喪哀毀骨立鼎革時父旣蒼峴山人文集卷五

八

老避兵鄉村先生以事羈縣城不得侍左右溽暑中走省無虛日篤友愛家有大役獨身任之居恆言動一循古禮自奉菲甚布袍敝履沒身而已先生性渾樸不露鋒鏑時時好行其德而不以自名一友負先生金病劇呼先生而字之曰吾必有以酬君明者先生聞之亟焚其券而往視焉中表某以逋糧爲胥吏所持窘甚先生遇於途遽返室力謀得五十金代之償蓋先生之尚義如是方岱之左官虔州也貽書戒之曰此方苦兵革但能救百姓便爲盡職岱奉其教招撫土賊所全活甚衆烏虜可以覘先生之爲人矣先生雖好推解不得位無所設施徒以一二事爲鄉黨閭里所誦述而先生重自斂抑不樂表暴卽其子若孫

疑有不得盡知者也。以某之謏陋，遂謂知先生之深矣乎。雖然，吾邑數十年來，孝謹忠厚之風稍衰矣。不言而躬行，賴有先生輩三數人在耳。今日就零落，至先生歿而後，生益不復有所矜式。按狀而書其遺事，已不勝老成典刑之思焉。先生生於明萬曆己酉十月二十六日，卒於康熙丁卯十月二十三日。以戊辰某月某日葬大池祖塋之右。華宜人前葬北門四堡新阡，至是遷以附焉。宜人有賢行，先生之德施於家而暨於鄉也。宜人實仗助之其葬也。高陽李文勤公爲之誌，子男五人，岱、戊、戌、進、士。歷浙江杭州府知府、獻國學生、番、岍、壬子舉人。候選知縣、岍國學生、女三人嫁娶皆士族。孫男十九人，女十五人。曾孫男七人。女。

蒼峴山人文集

卷五

九

二人先生少爲諸生，卽有意當世肆力爲文章，旁及奇門星歷諸書，靡不通曉。晚得疾，猶簡帙不去，手是宜銘曰：惟顧氏族，振振趾前美。揚清芬，吁先生孝且仁。色恂然如玉，溫視痾瘵疾在身。捐贏餘，脫溺焚名。則闡德乃信，俾昌熾裕。後昆後有考在茲文。

侯節母吳孺人墓誌銘

自二氏之教蔓延於天下，胥一世才智之士，莫不沈溺其中。至婦人女子生長閨闈，於其所謂因果罪福者，旣膠固而不可破。一旦遭逢變故，更喜其說之儵然空幻，足以消其抑鬱，其有從容中禮，知聖賢之中道而由之者，蓋千百中不得一二焉。某於侯節母之生平而不覺喟然也。節母

姓吳氏給事中諱汝倫之孫素衣先生諱桂森之子也先生倡明理學踵端文忠憲後主東林講席節母生而端淑之旨靡弗一一爲之剖析比長歸侯公仲長舅爾濟公早世節母事其姑王太孺人稱孝謹仲長公爲先外王父戶部公弟負才氣年踰三十以病歿節母號痛不欲生懼重傷姑心且諸孤幼乃曰昔人言死易存孤難吾敢辭其難者自是奉姑外一意撫其子迄於成立王太孺人通文史嘗作詩訓子孫凡百二十韻漳浦黃石齋先生夫人蔡書以勒石者也顧好釋氏書節母輒從旁翻閱教典以悅王太孺人及居恒課諸子則惟教以讀書好學研究聖賢之旨爲歸屆八十生辰子婦輩請作佛事笑曰二氏之教與聖賢異唄誦禮拜在彼已爲糟粕吾奚事此蓋其生平所自信者深矣昔程正公爲其母上谷郡君作家傳稱其不惑於神怪今節母乃能於儒釋之際精辨若此宜其不爲詭激而安驅徐行合於中正之道遭變而不失其正也魯齋王氏謂婦人不當特誌特誌而件繫其不踰閭之瑣事爲非古法如節母者猶爲不應銘法耶節母性儉樸侯氏自太僕公而下族故貴顯節母布衣蔬食終其身其生平懿行甚多以非節母之所難者故不書節母生萬歷壬寅八月十四日歿爲康熙乙丑十二月二十七日以丙寅九月二十五日丙午祔於六阜塢仲長公之兆子三人昕諸

生先卒煜諸生恆貢生候補州同知女一人適中書舍人
鄒治孫男五人孫女五人曾孫男七人長老言侯氏世有
貞壽往者王太孺人早寡壽七十餘今節母適與之符後
有君子采而著之庸以激揚風教不獨徵侯氏一家之嫻
已也節母爲先太孺人從母某幼隨先太孺人至外家節
母之行事得之親見者最久今先太孺人之棄某且二十
餘年矣節母之葬也諸舅氏以墓銘屬某於戲某何敢不
銘銘曰

宋儒有言希賢希聖孔孟家法仁義中正學絕道喪諸子
紛拏譬如入海茫無津涯二氏因之乘間而起舉世迴惑
出彼入此吁嗟節母乃生閨閣曰性曰命純粹不雜艱貞
蒼峴山人文集 卷五
矢志歷五十年勒詞幽石彤史考焉

嵩山玳水泉禪師塔銘

自明萬歷以來佛法昌於東南如鄧尉剖石壁華藏大樹
證諸古德振興宗風臨濟之傳益盛於世最後則嵩山玳
水禪師出焉之三公者皆吾邑人烏虜可謂盛矣師諱超
杲玳水其字無錫黃氏子父御梅母丁氏幼好跌坐年十
二出見道上死人忽動世間無常想白父求出家不許尋
遭祖喪學佛之志益堅偶登龍山絕頂得石洞愛其幽阻
遽歸書偈壁間以辭其親夜行入山中月明籟靜四顧長
嘯如脫樊籠遂結茅棲止洞傍月餘父尋求得之師堅以
出家請乃就惠山寺僧恆鑒祝髮於廊壁上見大慧禪師

竹篋子話力參四十餘晝夜往依龍池萬如禪師如問生死到來如何迴避師便禮拜如云莫弄精魂親切道一句看師轉身歸位如云不是不是送入堂研究至第六日不覺誤入方丈如見便問向何處去師驚擬如拈茶壺云見麼師忽有省云道甚麼如云未在更道師接壺擲地云道如便打師禮拜如云見箇甚麼道理便禮拜師擬進語如隨與一掌云不是不是師通身汗下急趨出至法堂覺情與無情炳然齊現遂說偈呈方丈至晚如呼師入室問父母未生前如何是本來面目師云某甲道不出如出前偈云此是誰作師接過便燒如云燒卽任汝畢竟如何是本來面目師云非惟某甲道不出三世諸佛也道不出如

蒼峴山人文集

卷五

三

云汝那得見諸佛師云一個鼻頭兩箇孔如云莫謗他好師拂袖便出如云腳跟未穩在師不顧歸堂如復命師茅菴住靜一夕疑情頓發達旦不寐次日上龍池見山門龍池曉雲四字始大徹悟如爲師印可焉師在龍池圓具戒卽歷諸方參叩洞宗一尊宿欲招致師師曰某自有師在仍歸龍池如以師年少命爲首座古帆楫嗣旣囑付遣住徑山靜室地荒遠風雪中樵蘇絕迹同住僧皆散去師獨居數月乃還無錫掩關鷺湖之上夜夢伽藍神言西去十五里是師宏法地適嵩山寺僧請師主席遂居嵩山未幾遊京師禮笑巖祖塔緇素問道者日衆順治十四年秋住

慈雲寺

世祖章皇帝聞師名賜帑金啓建禪期明年冬移住香山永安寺又明年二月住慈壽寺

召見便殿賜衣一襲

大駕三幸慈壽師酬對俱稱

旨四月

詔於萬善殿說法語詳錄中是時天下名僧被召者四人而師寵遇最久力求還山奏三上始

允師歸而有毀師於

上者十七年冬追至京

上察其枉命寓甘露寺明年正月

龍御上賓又數日得

蒼峴山人文集

卷五

三

旨放還嵩山嵩山寺者創始於梁嵩頭陀重建於元僧物外荒蕪已二百年所師之自鷲湖而主茲寺也浚古井得石碣有懸記符師名號時已卜師必興是山會北行修建未備至是始畢工翼如煥如遂爲吾邑精藍之冠康熙二年安親王延至京住慶豐寺閱五年南還葺惠山寺殿殿成乃遊峨帽登南嶽又詣京師建屋笑巖祖塔傍以接衲子成舊志也尋遊嶺南曹溪修供六祖而歸歸後修錫山龍光塔建藏照閣於惠山寺左以奉藏

御賜道影後復遊楚抵長沙歸至揚州得未疾從者請還山師笑曰何地非山吾知時至而已康熙十六年十月十七日示寂於眞州千佛寺年四十九僧夏二十師賦性簡

亢不事名聞利養名山法席踐歷甚多每登座說法威儀
赫然下坐服糞帚衣與傭工雜作了不自異少未嘗多讀
書及爲詩文條暢無滯礙遇人無貴賤一待以誠信有不
可其意者輒至呵罵人或不能堪故人愛師者謂師真率
詬師者謂之狂然終不能訾其見地毀其戒行也余昔從
軍楚中遇師於漢陽月夜同登大別山語余曰吾歸當縛
一竹筏浮太湖中坐其上隨流東西以待期盡終不復與
人接矣別未久而真州之訃至豈師以逆旅爲竹筏江流
爲震澤耶其得法弟子不息乾無住聞越凡超小宗本魯
山峯五人受學弟子懷一冲等十餘人師旣寂之十二年
不息懷一葬師於嵩山寺右謁余爲塔銘銘曰

蒼峴山人文集

卷五

志

龍峯蜿蜒梁溪清澗累生宗師振興法筵師視世間如蠶
縛纏辭塵學佛祝髮名山龍池禪窟天童再傳師從得悟
頓離言詮嵩山古刹廢二百年師來應識琳宮煥然一雨
所潤歷主戒壇蹴踏龍象證上乘禪飛錫神京契我
聖人艸衣木食浩然而還五嶺三湘常羊洄沿時至則行
超脫世緣嵩山之陽師塔在焉其潛其藏我其銘旃

華頂仁叟震禪師塔銘

師諱詒震字仁山晚號仁叟無錫單氏子世爲儒家父元
祐母范夢一僧至其家自稱道宗而生師幼入鄉校讀書
卽解大義稍長奮然有出家之志年十六從福城院僧岳
止受業會聖恩壁公過福城師一見皈心焉踰年受息慈

戒於穹窿曇禪師因請名忽疾雷大震曇曰吾宗到汝當
震動諸方卽以震名嘗得紫柏大師語錄閱之恍如宿習
豁堂崑公繼席三峯師依止結夏至杭州靈隱寺謁具德
禮公隨衆參五晝夜至第六日忽會得棒喝落處自是徧
遊浙東西名剎謁玉林琇公於南澗愚菴孟公於吳門最
後謁璧公於聖恩寺尋歸靈隱居記錄寮久之復至聖恩
師自謂悟處穩實且經師家印可凡有徵詰隨問隨答璧
公盡斥爲狂解一日璧公舉靈雲驢事未去馬事又來語
詰師連下數十轉師當下領會璧公云更須洞徹元奧始
得旋以竹篋付師令分座接機師作參禪第一步要訣凡
四千言以策發學者言皆警切甲辰上元日見僧在伽藍

前卜筮忽契三元三要之旨乃歎曰老人言諸方總是囹
圄頭禪自是我輩不會璧公聞之喜曰臨濟正傳有屬矣
師念前後在靈隱九年聖恩三年方得了辦學道之難如
此因涕泣不能止久之同門月航禪師退天台寶華院璧
公願師云汝緣在彼宜往設化又曰先三峯一生提唱綱
宗傳法十二人而獨以接續宗旨屬我我不能大行其道
惟望子耳時乙巳八月初八日也師至天台領衆說法然
志在隱居住院非本意明年登華頂禮無見觀禪師塔雲
深路窄絕無人跡師喜曰此吾棲隱地也華頂故有東明
寺旁有泉已涸師默禱曰泉若再出吾當居此明日覘之
泉果溢遂構茅堂五楹居焉師素有續傳燈錄之願山居

無事從事纂輯先編燈史紀年爲載筆之始明年歸聖恩
開堂秉拂環聽者千人繼之堯峯謁南岳退翁儲公語相
契時璧公欲謝聖恩院事請南岳主法席南岳以讓師無
何璧公示寂師舉吼崖禪師繼席仍歸華頂與所從數十
人日夜拈提宗旨暇則結集老人語錄雖嚴寒手指凍裂
不少間聞璧公入塔期乃返吳門諸搢紳請師住師子林
未幾無錫請師住寶安寺師辭師子林而就寶安居五年
三峯燈史成後應堯峯興福寺之請時注編修鈍翁居堯
峯與師游一日偕注刑部蛟門謁師茶次蛟門云我輩在
塵網中所爲不能合道如何師云日用應緣不起一念原
與道合纔生心動念便與道離鈍翁云卽今喫茶如何合

蒼峴山人文集

卷五

六

道師云要喫便喫說甚合不合二注點首禪宗正傳燈史
成戊午復上華頂得金剛三昧經讀之謂其旨與宗門通
因爲衆說之疏其語名曰通宗記壬戌秋鈍翁偕范檢討
秋濤葺治天平白雲寺迎師爲逸老之居師至不上堂有
問者隨宜開導而已時吼崖禪師年已八十師入山代其
結制鍛鍊學者自是常在聖恩無事則居福城輯天童三
峯授受事實及先輩詩文有關法門者爲三峯獻徵錄濟
宗補續燈史亦成乙巳春

皇上南巡至蘇州

幸聖恩寺師以金剛三昧通宗記三峯燈史并萬言書進
俱經

御覽焉吼崖禪師卒師推月航禪師繼席蓋同門之長也
又至靈隱訪碩揆禪師語及通宗記揆公以爲稍涉理路
師曰我述此紀欲使習教者入我宗門會禪者兼通教義
耳旣而月航禪師復卒業以法席非師不可爲堅請師不
得已應之山中規條久廢信施稀少僧衆五百餘而齋廚
蕭然無數日儲師力振頽緒遂盡復壁公之舊道價日高
四方士大夫問道者日益至會夏旱鄉人請祈雨師領衆
於烈日中徧行阡陌佛號震天頃之大雨如注住聖恩三
年得怔忡疾貽書同門欲退院而中丞商正宋公聞之遣
使慰畱師遂勉畱住持而退志益堅乙亥四月十二日搥
鼓上堂有敢告諸天龍曳杖從茲去之句下座便行至華

蒼峴山人文集

卷五

七

頂重葺草堂以居作淨土偈一百八首效永明真歇故事
日持佛號三萬聲曰吾不欲久耽娑婆將徧游刹土自極
樂始門人照孚迎師歸福城覺徵請師住來鶴菴師強應
之隨示微疾於丁丑七月初二日沐浴更衣西向趺坐而
逝世壽六十七僧夏四十六師賦性剛直勇於任事一生
承接師法提唱宗旨雖遭諸方忌嫉而爲之愈力喜著述
說法之眼卷帙縱橫風鈔雪纂至老不廢爲文章滔滔汨
汨暢其意而止與人交直吐胸臆吾師堵禾齋先生宿學
老輩與師書必稱弟子鈍翁博通內外典於人多怪少可
獨於師敬禮而其受同輩之誦者有二一則吼崖篤老聖
恩院事漸廢師上書勸其退羣謂師幸其退而冀有其席

及吼崖順世乃力舉月航其後師繼席四年道風方盛而
遽以疾辭飄然遠逝貪戀法席者如是乎一則以三峯年
譜南岳已有成書師更刻紀年謂曰爭名夫南岳佛法文
章名重天下後進欲與爭名非愚卽妄以師高明決不出
此且紀年一書本聖恩寺舊藏稿師爲之潤色非已作也
况三峯非一人之師各尊其師各紀其事或詳或略不妨
兩行師何較焉師凡八坐道場天台寶華華頂東明無錫
寶安蘇州師子林堯峯興福天平白雲鄧尉聖恩得法弟
子智覺覺奇祖印照孚覺徵覺經覺倫覺文大成覺著覺
願覺慎十二人所著各會語錄及通宗記燈史三峯獻徵
錄華頂集諸書共一百六十餘卷余與師幼同里長爲方
蒼峴山人文集

卷五

文

外交師嘗謂余可學道而汨沒世故老而無成深負師意
然不可謂不知師者其徒照孚等將奉師骨建塔華頂來
請銘銘曰

惟我梁溪世生法王三峯父子逌振祖綱師迺繼之亦生
我鄉早歲得法入坐道場踞曲盃牀氣蓋諸方轟雷激電
傾篋倒囊著述等身洪覺不讓叶煌煌燈史綱舉目張通
宗一出義虎仆僵結茅華頂天台石梁繼歸鄧尉祖席頓
光說法已竟曳杖長往叶師之行履古人相抗叶法運衰
晚賴師支撐叶師今已矣緇白哀傷靈山之窟遺蛻永藏



